



Inatsisartunut ilaasortaq,
Lars Poulsen,
Siumut
Maani/

Tasiilaq pillugu § 37 naapertorlugu apeqqummut nr. 09 - 2025-mut akissut

Inatsisartut suleriaasianni § 37-mi imm. 1. naapertorlugu Tasiilaq pillugu Naalakkersuisunut apeqquteqarputit. Apeqqutit suliaasaqarfigisannit akineqartussanngorlugit innersuunneqarput.

1. Naalakkersuisut Nunatta Kangiani aalisarnikkut ineriartortitsineq nangittumik ingerlaannarnissaa pilersaarutigaat, Tasiilami suliffissuaq ilanngullugu?

1-imut) Aap, Tunumi aalisarnermik ineriartortitsinissamut pilersaarut 2024-2030 Naalakkersuisut 2024-mi akueraat. Pilersaarut Aalisarnermut, Piniarnermut, Nunalerinnermut Imminullu Pilersornermut Naalakkersuisoqarfimmit, Tunumi aalisarnermik ineriartortitsinissamut aqutsisoqatigiit, aalisartut, KANUAPNA, Pinngortitaleriffik kiisalu Kommuneqarfik Sermersooq peqatigalugit massakkut piviusunngortinniarneqaleruttorpoq.

Suliniutit arlallit aallartinneqarput, soorlu aalisartunut atortut, pikkorissaanerit, Tunumi sikunik alapernaarsuisoqartalerinissaanik suliaq, Tunumi sinerissap qanittuani saarullit pillugit immikkut aqutsiveqalerinissaq kiisalu Tunumi nipisanniarnermik aallartitsinissaq. Ineriartortitsinermut pilersaarummi suliniutit ukiuni aggersuni aallartinneqartussat arlaqarput.

Tunumi aalisarnermik ineriartortitsinermut atatillugu ulluni 27.-29. april 2025 aappasaanik aalisarneq pillugu isumasioqatigiissitsisoqarpoq. Royal Greenlandip Tasiilami fabrikissaa ammaqqaalersoq isumasioqatigiinnermi peqataatitaqarpoq.

Isumasioqatigiinnermut tunngasut uani itinerusumik atuarsinnaavatit:

https://naalakkersuisut.gl/Departementer/Fiskeri_Fangst_Landbrug_Selvforsyning/Fiske_riafdelingen/Oestgroenland?sc_lang=kl-GL

2. Tasiilap nunaqarfiisalu aalisarnikkut ineriartortinneqarneri nangillugit pissappata suliaasat suut suliarineqartariaqassappat?

2-mut) Suliniutissat isumassarsiallu amerlasuut isumagineqartussaapput, soorlu aalisartut Tunumeersut arlaleriarluni pikkorissartinneri, aalisarnernit paasisutissanik katersinerit, paasisitsiniaanerit, atortut amerlanerusut sinerissallu qanittuani ilisimatuussutsikkut misissuinerit. Pineqartut tamarmik ineriartortitsinermut pilersaarummi anguniagassartalerlugit piffissalerlugillu allaaserineqareerput.

12-05-2025
30-04-2025
Suliap normua: 2025 - 9557
All. nr. 25317833

Postboks 269
3900 Nuuk
Oqarasuaat (+299) 34 50 00
Fax (+299) 34 63 55
E-mail: apn@nanoq.gl
www.naalakkersuisut.gl

Tunumi aalisartunik oqaloqateqarlunilu pitsaasumik ataqatigiissaarinissaq pingaarnerpaavoq, tamannalu 2024-mi 2025-milu arlaleriarluni isumasioqatigiissitsinikkut, immersugassanik immersuisitsinikkut aamma Tunumi aalisarnerup ineriartortinneqarnissaanut aqutsisoqatigiit Tunumi aalisartunit, kommunimit, KONFIFA-mit tunisassioqatigiit KNAPK-imillu peqataaffigineqartumik ilaatigut pipput. Atortut pisariaqartitat taakkualu qanoq atorineqarnissaat qulequttallu allat pillugit Tunumi aalisartut Aalisarnermut, Piniarnermut, Nunalerinnermut Imminullu Pilersornermut Naalakkersuisoqarfimmit ingerlaavartumik oqaloqatigineqartarput.

Ineriartortitsinnermut pilersaarusiap atuunnerata nalaani suliat killiffii pillugit ukiut tamaasa nalunaarusioqartassaaq, Naalakkersuisut.gl aqqutigalugu tamanut saqqummiunneqartartussamik, nittartakkamilu tassani Tunumut tunngasunik immikkut qupperneqartassaaq. Quppernermi tassani paasissutissat, atortut il.il. tamarmik saqqummiunneqartassapput, taamaalilluni aalisartut innuttaasullu suliamik malinnaasinnaalersinneqassapput paasissutissanillu pisariaqartitaminnik ujaasisinnaanngussallutik.

Nalunaarusiaq 2024-mut tunngasoq piffissami aggersumi saqqummiunneqassaaq.

Qupperneq uani nassaaressinnaavat:

https://naalakkersuisut.gl/Departementer/Fiskeri_Fangst_Landbrug_Selvforsyning?sc_la ng=kl-GL

3. Aalisarnermut inatsit nutaap aamma nunatta avataanut niuersinnaanerup ammanerulersinneqarnerata kingunerisaannik, aalisarnikkut Kulusuup mittarfiata qanoq pilersaaruteqarfigineqarpa

3-mut) Ineqarnermut, Attaveqaasersuutitut Isorliunerusunullu Naalakkersuisoqarfik Greenland Airports A/S-imut paasissutissanik pissarsiniarpoq, ingerlatseqatigiiffiup taassuma ilisimatitsissutigaa nunatta avataanut nioqquteqartarnissamik soqutiginnittunit kissaat pillugit maannamut attavigineqarsimanatik. Atuisartunit soqutiginnittoqassappat, Greenland Airports A/S siunertaqartumik oqaloqatiginninnissaminut soorunami piareersimavoq. Kulusuk aqqutigalugu nunatta avataanut nioqquteqartarnissaq soqutigineqassappat, qulequttat arlallit isiginiarneqartariaqassapput:

a) Nassiussat imarisai pillugit isumannaallisaaneq eqqarsaatigalugu misissuineq. Tunitsivinnut allanut nioqquteqassappat, nassiussat isumannaallisaaneq eqqarsaatigalugu misissuisoqartariaqartassaaq aamma inuussutissat Island aqqutigalugu nassiunneqartassagunik misissuisarnerit eqqarsaatigalugit immikkut ilinniagaqarnissamik tamanna pisariaqartitsissaaq. Nassatat nalinginnaasut misissortarneritut Kulusuup mittarfiata massakkut taamaallaat atortoqarpoq, soorlu aamma sulisut ilinniarteqqaarneqartussaassapput. Nunatsinni namminermi nassiussat isumannaallisaaneq eqqarsaatigalugu misissorneqaqqaarnissaminnik piumasaqaatitaqanngillat aamma taamaattumik aalisakkanik Nuummot nassiussisinnaaneq periarfissaassaaq.

Nuummi nassiussat imaannik misissuuteqarpoq aamma isumannaallisaaneq eqqarsaatigalugu aalisakkanik misissuinissamik ilinniagalinnik sulisoqareerluni, taamaattumik nunani allani niuerfinnut nassiussuisoqarsinnaassalluni.

b) Nassiussanik isumaginninnermi atugassarititaasut: Aalisakkanik avammut nioqquteqarnermi pingaarutilerujussuaq tassaavoq tunisassiat eqqortumik nillusaateqarnissaannik qulakkeerinninnissaq aamma mittarfimmi nillusaatinut aningaasaliinissamik tamanna piumasaqaatitaqassaaq.

c) Timmisartortitseqatigiiffiit nassiussanik assartuisinnaasut: Kulusummi mittarfik timmisartunik sarpilinnik, soorlu Dash 8-Q200-imik aamma Dash 8-Q400-imik, kiffartuussisinnaavoq. Icelandair Dash 8-Q400 atorlugu Kulusummut aasaanerani timmisartuussisarpoq, usigisinnaasaasali oqimaassusaat killeqarput aamma nalinginnaasumik timmisartuussinermi oqimaannerpaamik 0,5 tons tikillugu usisinnaassuseqarluni.

Inussiarnersumik inuulluaqqusillunga



Peter Borg

Aalisarnermut, Piniarnermut Nunalerinermut Imminullu pilersornermut Naalakkersuisoq